


# YAKUBU



The history of Jacob in Bokobaru as recorded in the Ataura,  
the first book of Moses: Naana 28.1 – 36.14.

## **Yakubu tana Labā kiia**

Ben Isaaku Yakubu sisi à sa'ole kène à yādàne à bè: Nton nɔɔ se Kanaa nɔgbɛnɔ tero. N fɛɛ n gá Mesopotamia busun n da de Betueli bɛ, n nɔɔ se gwe n desɛ Labā nenɔ tɛ. Luda Gbāapingide aubarikadangu à to n nɛ'i maamaa, aɔgɔ kaara lɛ n gɔ boriino dezi ũ. Luda aubarika kè à dà Ibraĩn dangu kɔn n boriino, lɛ bɔsu kè nɛɛ nibɔbleen gɔnne, bɔsu kè à kpà Ibraĩa. Ben Isaaku Yakubu gbàre à gá Labā kiia Mesopotamia busun. Labā né Siria bɔsu gbɛ Betueli néme, Yakubu kɔn Isauo desɛme.

Isau mà Isaaku sa'ole kè Yakubune à à gbàre Mesopotamia lɛ à nɔɔ se gwe. Kè à sa'ole pì kène, à bè àton nɔɔ se Kanaa nɔgbɛnɔ tero. À taasikè kè Yakubu a de kɔn a dao yāmà à dà Mesopotamia zen. Ben à dɔ sa kɛ a de pɔɔ nna kɔn Kanaa bɔsu nɔgbɛnɔro. Ben à gàa Ibraĩ né Sumaila kiia à à né Maala sè à nà a nɔ kaakunɔa. Maala né Nebayo dāremɛ.

## **Yakubu nana'ona Beteli**

Yakubu bɔ Bɛɛseba à dà Arana zen. Kè à kà gukea, à yezi à i gwe kè ɔfāntɛ gɛ kpen yānzi. Ben à gbe sè guu pìn a m̀dibɔ ũ à dàɛ gwe. Ben à nanaa'ò à gára è pɛɛna tɔɔtɛ ai à gàa à zɛ ludambɛɛa, Luda malaikanɔɔ e didiia aɔɔɛ pitaa. À Dii è zɛnaala à bè: Mambe Dii n dezi Ibraĩ kɔn n de Isaakuo Luda ũ. Mé bɔsu kè n dāɛa kekii kpamma, mpi kɔn n boriino. N boriino égɔ pari lan busuti bà, aɔɛ dagula ɔfāntɛbɔɛ kpa kɔn ɔfāntɛgɛkpen-o kɔn gu'igbārooo kɔn sɔɔmɛtɛo. Anduna bori pingi é aubarika e mpi kɔn n boriio gāzĩ. Mégɔ kunyo, mégɔ n dākpaa guu kè nɛɛ gaan pingi, mé ɛara mà sunyo bɔsu kekiin, zaake mé n tonlo mé yā kè má ònnɛɛ kɛ.

Kè Yakubu vù kōn iio à bè: Dii ku gura kè, ben mée dōro! Vĩa à kù à bè: Guu kè ma kã fèe. Luda beeme, ludambe zeme.

Yakubu fèe kongo à gbe kè à kè m̀idibɔ ũu pì sè à pèe dɔngupɔ ũ, ben à ńsi kù. Ben à tɔkpà guu pìne Beteli, m̀ode wete kè wà kàe gwe tɔ kaakun Luzu. Yakubu lusè Diine à bè: Tó n̄ kumao, tó né ma dākpa ma wete kekii gana guu, tó né ma gba pɔblee kōn pɔkāsāano ai ma gaa ma su ma de be aafia, n̄gɔ de ma Luda ũ, gbe kè má pèe dɔngupɔ ũu pì é gɔ n̄ gbāgbākii ũ, pɔ kè n̄ ma gba pingi, mé à kuridee kpamma.

### **Yakubu kana Labā be**

Yakubu èara à dà zen à gàa ɔfántēbɔɛkpadeeno busun. Kè à kà gwe, à logɔ è s̄en s̄a kpàsa leo aagɔ kaena à sae, zaake logɔ pì ín wè kpammá. Gbe bita tatana logɔ pìle. Tó kpàsa pìno kàkɔa gwe pingi, ben wè gbe pì go logɔ pìle wà í kpammá, ben wè èara wà gbe pì tataàle a gben. Ben Yakubu sādārinɔ là à bè: Gbēno, a bɔ mame? Aɔ wèàla wà bè: Wa bɔ Araname. Ben à n̄ la à bè: Á Nao dio Labā dɔɔ? Aɔ wèàla wà bè: Wá à dɔ. Ben à n̄ la à bè: À aafiaɔ? Aɔ bè: À aafia. N̄ à né Raseli gwa, èe mɔɔ kōn sāano kãaa. Ben Yakubu bè: ɔfántē kpe gbāa, sāano tagurɔɔ e ka kòro. À í kpammá à gá n̄ dā. Ben aɔ bè: Wé f̄ɔro. Tó èe ke s̄a kpàsano kàkɔa pingi baasiro, wè gbe go logɔ pìle wà í kpammáro.

Kè èe yā'oonné le, Raseli m̀ò kōn a de sāano, zaake sādārin à ũ. Kè Yakubu a desē Labā nenɔgbē Raseli è kōn à de sāano, à s̄ò logɔzi à gbe gò logɔ pìle, ben à í kpà a desē sāanoa. Ben à lepè Raselia à ponna ɔd̀d̀. Ben à òne kè à de dane Rebeka n̄en a ũ. Ben Raseli bàale à gàa à ò a dene. Kè Labā a dāre né Yakubu baaru mà, à bàale à gàa daàle. Kè à kà, ben à kùsia à lepèa à tào

a be. Ben Yakubu yā kè kènɔ òne pingi. Ben Labā bène: Ma arume n ũ yāpura.

### **Yakubu Lea kɔn Raselio sɛna**

Yakubu kè Labā be mɔ do, ben Labā bène: Kè n de ma dane ũ yānzin né zīikeme pāo? Dia mé fiabonne nà n omɛ. Labā sɔ nenɔgbɛnɔ vī gɔɔn plaa. Yɔɔ tɔn Lea, Bāa sɔ Raseli. Lea wée busana, Raseli sɔɔ nɔkpare maaame, ben à kakana maa. Yakubu ye Raselizi, ben à bè Labāne: Mé zīikenne wè swɛɛplaa n né bāade Raseli yānzi. Labā bè: À sɔɔ mà à kpamma de mà à kpa gbɛ pāndeala. Ngɔ ku ma be kè.

Ben Yakubu zīikène wè swɛɛplaa Raseli yānzi, ase à kène lan guro plaa bàme kè à yezi yānzi. Ben à bè Labāne: Kè ma zī gurɔɔ pàpa, n ma nɔɔ kpama mà sé. Ben Labā gwedeeno kàkɔa n pingi à nɔsɛpɔblee kènné. Kè uusie kè, ben à a né Lea sè à kpàa, ben Yakubu dàeo. Labā a nɔgbɛ zīkeri Zilipa kpà Leaa zīkeri ũ. Kè guu dɔ Yakubu è Leame, ben à bè Labāne: Bɔyānzi n kème lɛɛ? Raseli yānzin ma zīikènnɛziroo? Bó bé à tò n ma kɛkɛ? Labā bè: Wa kiia wè Bāa kpa gɔɔa Yɔɔ āro. N azuma doo kɛ kɔn gbɛ beeeo gĩa, mé à gbɛndoo kpamma zīi kè né ɛara n kɛme wè swɛɛplaa pānde pɔ ũ. Yakubu wèzi à azuma doo pì kè kɔn Leao, ben Labā a né Raseli kpàa nɔɔ ũ. Labā a nɔgbɛ zīkeri Bila kpà Raselia zīkeri ũ. Yakubu dàe kɔn Raselio sɔ, ben à yezi de Leala. Ben à ɛara à zīikè Labāne ai wè swɛɛplaa dɔ.

### **Yakubu nenɔ**

Dii è Yakubu ye Leaziro, ben à à kè nɛdandee ũ, Raseli sɔ pāaame. Lea nɔsɔ à nɛl gɔgbɛ ũ, ben à tɔkpàne Rubeni, zaake à bè: Dii ma nawɛakena gwà. Ma zā égɔ yemazi sa. Kè à nɔsɔ dɔ,

à ne'i gōgbē ũ, ben à bè: Dii mà ma zā yemaziro, ben à èara à né kekii kpàma dɔ. Ben à tɔkpàne Simeɔ. Kè à èara à nɔsì dɔ, à ne'i gōgbē ũ à bè: Kekii sa ma zā é ma diekii ero, zaake ma negōgbē ìo men aagō. Ben à tɔkpàne Levi. À èara à nɔsì dɔ à ne'i gōgbē ũ à bè: Kekii sa ma Dii saabukpà, ben à tɔkpàne Yuda. Ben à ne'ii zè.

Kè Raseli è ée ne'ii kōn Yakubuoro, à gōaanɔkpà kōn a vīio. Ben à bè Yakubune: Ñ nɔɔmagu. Tó mée e sōro, mé game. Yakubu pɔfèzi à bè: Mambe Luda ũ kè n tē néɔ? Ben Raseli bè: Ma zīkeri Bilan ye. Ñ gá io à nenɔ ime, mé borii e se à gāzī. Ben à a zīkeri Bila kpàa nɔ ũ. Yakubu dàeo, ben à nɔsì à ne'i gōgbē ũ. Ben Raseli bè: Ludaa tò yā bōmao nna à ma yāmà, à ma gba negōgbē. Ben à tɔkpàne Dani. Raseli zīkeri pì èara à nɔsì à ne'i gōgbē ũ dɔ, ben Raseli bè: Ma ɔsi ìsi kà kōn ma vīio ma ɔsii nè. Ben à tɔkpàne Nafatali.

Kè Lea è a ne'ii zè, ben à a zīkeri Zilipa kpà Yakubua nɔ ũ dɔ. Ben Lea zīkeri pì ne'i gōgbē ũ kōn Yakubuo. Ben Lea bè: Mìnnaame. Ben à tɔkpàne Gada. Ben Lea zīkeri pì ne'i gōgbē ũ dɔ kōn Yakubuo. Ben Lea bè: Ma pɔɔ kè nna, zaake nɔgbēno é be ponnadeen ma ũ. Ben à tɔkpàne Asa.

Rubenì bò esekēguro à yenzi ēzē è sēn, ben à bōbo à sùo a da Leane. Ben Raseli bène: Ñ n né yenzi ēzē pì dāmē. Lea bène: Kè n ma gōɔ sìma, beee e mōmmaro, ben ní yezi n ma né yenzi ēzē si dɔɔ? Raseli bè: Tó ní kpàma, mbe ne'io gbàa.

Kè Yakubu e suu kōn burao uusiē, Lea bò à gāa à dààlè à bè: Mambe mé inyo gbàa, zaake ma n sēkā ma né yenzi ēzē yānzime. Ben à ìo gwāāvī beee. Luda Lea wēekē sì, ben à nɔsì à Sāani ì kōn Yakubuo. Ben Lea bè: Luda laada kpàma, kè ma a zīkeri

kpà ma zāa yānzi. Ben à tɔkpàne Isaka. Lea èara à nɔsì dɔ à Tori ì, ben à bè: Luda gba maaa dàme. Kekii sa ma zā é ma kpeda, zaake ma negɔgbẽnɔ ìo men swèedo. Ben à tɔkpàne Zebuluni. Zāazāa à nenɔgbẽ ì, ben à tɔkpàne Dina.

Ben Raseli yā dɔ Ludan à à wèeke sɪ, ben à kè nedandee ũ. À nɔsì à negɔgbẽ ì, ben à bè: Luda wí bòmɛ. Ben à tɔkpàne Yusufu à bè: Dii ɛara à negɔgbẽ pānde kaaramɛ dɔ.

## **Yakubu pɔnɔ dāna Labāne**

Kè Raseli Yusufu ì, Yakubu bè Labāne: Ñ ma gbare mà ta ma be busun. Ma zīikènne ma nɔnɔ kɔn ma nenɔ yānzi. Ñ n kpama mà ta, zaake n dɔ lan ma zīikènne nà. Ben Labā bène: Tó ma n pɔnnaa è, n gɔmao kè. Ma masokè má è Dii aubarika kème n yānzi. Ñ n asaiapɔ ome, mé kpamma. Yakubu bène: N dɔ lan ma zīikènne nà. N dɔ lan n pɔkādeenɔ kè ma ɔzì nà, zaake à fete kè n vī zaale mée mɔroo kàara maamaa. Dii aubarikadàngu guu kè ma gaan n be pingi. Bɔren mé ma zīinda be zīike sɔw? Labā à là à bè: Bɔn mé fīaboonneɛ? Yakubu wèàla à bè: Nton pɔke kpamaro, mɔde n yā kè keme, mégɔ n pɔnɔ dāanne. Ñ to mà gẽ n pɔnɔ te gbāa mà sã bakebakenɔ kɔn à togetogenɔ pleple ma asaiapɔ ũ kɔn sãne bɔrɔ siaanɔ kɔn blè bakebakenɔ kɔn à togetogenɔ. Tó n ma asaiapɔ gwà gana guro aezì, né dɔ tó má yāpuraa vī. Blè kè kuu bakebakero ben à togetogero, ke sãne bɔrɔ kè siaro, èndɛ ma kpāi'òmɛ. Labā bè: Tò! Àgɔ de lan n ò nà. Zī beee Labā à blekofii bakebakenɔ sè kɔn à wēzādeenɔ kɔn blèda togetogenɔ kɔn à bakebakenɔ, aɔ pɔ kè aɔw puraa vīinɔ pingi kɔn sãne bɔrɔ siaanɔ pingi, à n ná a negɔgbẽnɔne n

ɔzĩ. Ben à kpangu dà ní dagura kɔ̃n Yakubuo lan guro aagɔ̃ ta bà, ben Yakubu e Labã pɔ̃ kpaaano dãa.

Yakubu lí bori aagɔ̃ gã búsunɔ̃ zɔ̃zɔ̃ à ní wẽzã kpàkpa à ní wẽzã kè púu. Ben à lí kè à ní wẽzã kpàkpa pìnɔ̃ pèɛpɛɛ pɔ̃nɔ̃ gbãngo imikiia, pɔ̃ kè aɔ̃ɛ mɔ̃ɔ̃ iminɔ̃ wɛɛn, zaake gwen aɔ̃ɛ kpakpa'on. Tó aɔ̃ kpakpa'ò lí pìnɔ̃ saɛ, ben aɔ̃ɛgɔ̃ né wẽzãdeeno ii kɔ̃n à togetogenɔ̃ kɔ̃n à bakebakenɔ̃. Yakubu è pɔ̃nɛ pìnɔ̃ pleple adona è à wẽzãdeeno kɔ̃n à siaano ka Labã pɔ̃nɔ̃ guu. Lɛmɛ à azĩnda kpàsa bɔ̃ lɛ, èe ka Labã pɔ̃nɔ̃ guuro. Tó pɔ̃bori maaano fɛɛ kɔ̃n kpakpa'onao, Yakubu è lí pìnɔ̃ pɛɛpɛɛɛ pɔ̃nɔ̃ aezĩ imikiia, lɛ aɔ̃ kpakpa'o ní saɛ. Tó pɔ̃ ginanɔ̃mɛ sɔ̃, è lí pɛɛpɛɛnnéro. Len pɔ̃ ginano gɔ̃ Labã pɔ̃ ũ lɛ, ben pɔ̃bori maaano gɔ̃ Yakubu pɔ̃ ũ. Ben Yakubu auziki ègɔ̃ kaara maamaa à pɔ̃nɔ̃ parikũ kɔ̃n nɔ̃gbɛ zĩkerinɔ̃ kɔ̃n gɔ̃gbɛ zĩkerinɔ̃ kɔ̃n lakuminɔ̃ kɔ̃n zaakinɔ̃.

## **Yakubu bàalena Labãne**

Yakubu yã kè Labã nenɔ̃ e oo mà kè aɔ̃ bè: Yakubu wa de pɔ̃nɔ̃ sia pingi. Wa de auziki guun à kaarana èn. Yakubu dɔ̃ Labã wéɛa, kè a yã ku à nɔ̃sɛ guu lan yãa bà dɔ̃ro. Ben Dii bènɛ: Ñ ɛara ñ ta n dezi busun n danenɔ̃ bɛ, mégɔ̃ kunyo. Ben Yakubu Raseli kɔ̃n Leao sìsi aɔ̃ mɔ̃ a pɔ̃nɔ̃ kiia sɛn. À bènné: Má dɔ̃ a de wéɛa kè ma yã ku à nɔ̃sen lan yãa bà dɔ̃ro. Baa kɔ̃n beeeo ma de Luda kumao. Á dɔ̃ azĩdane kè ma zĩikè a denɛ ma gbãa lemme. A de ãndɔ̃kèmmɛ à ma laada liɛ gɛn kuri, ben Luda e to à yãke kèmmɛro. Tó à bè sã bakebakenɔ̃ ma baka ũ, sãano ègɔ̃ né bakebakenɔ̃ ii. Tó à bè à wẽzãdeeno bé wà ma baka ũ, sãano ègɔ̃ né wẽzãdeeno ii. Luda a de sãano sia à kpàma.

Gurɔ̀ kɛ̀ blɛ̀nɔ̀ e kpakpa'oo, ma nanaa'ò, ben nanaa guu má è blekofii kɛ̀ aɔ̀ɔ̀ kpakpa'oonɔ̀ né blè wɛ̀zãdeenɔ̀mɛ̀ kɔ̀n à bakebakenɔ̀ kɔ̀n à togetogenɔ̀. Ben Luda Malaika bèmɛ̀ nanaa pì guu: Yakubu! Ben ma weàla ma bè: Maɛ̀ kɛ̀! À bè: Ì weɛ̀ɛ̀ n̄ gwa. Blèkofii kɛ̀ aɔ̀ɔ̀ kpakpa'oonɔ̀ pingi blè wɛ̀zãdeenɔ̀mɛ̀ kɔ̀n à bakebakenɔ̀ kɔ̀n à togetogenɔ̀, zaake ma yã kɛ̀ Labã kɛ̀nnɛ̀ɛ̀ è pingi. Mambe Luda kɛ̀ bò à m̀nzi Beteli ũ, guu kɛ̀ n̄ gbe pèen n̄ n̄́si kùà n̄ lusèma. Tia sa ì fɛ̀ɛ̀ n̄ bɔ̀ bùsu kɛ̀n̄ ì ta n̄ be busun. Ben Raseli kɔ̀n Leao bènɛ̀: Wá tubi vĩ wa de be dɔ̀ɔ̀? Èe wa diɛ̀ gbẽ zĩtɔ̀nɔ̀ ũnloo? A wa yamma, ben à à ɔ̀ blè pingi. Auziki kɛ̀ Ludaa sì wa dea gɔ̀ wa pó ũ pingimɛ̀ kɔ̀n wa nenɔ̀. Ì yã kɛ̀ Ludaa ònnɛ̀ ke pingi sa.

Ben Yakubu fɛ̀ɛ̀ à a nenɔ̀ kɔ̀n a nɔ̀nɔ̀ dì lakuminɔ̀ kpɛ̀ɛ̀. À a pɔ̀kãdeenɔ̀ kɔ̀n auziki kɛ̀ à è Mesopotamianɔ̀ sɛ̀ɛ̀ pingi, ben à dà zen èe taa a de kiia Kanaa busun. Kɛ̀ Labã gàa a sãanɔ̀ kã kɛ̀ɛ̀, ben Raseli à tãanɔ̀ sɛ̀ kpãì à kpɛ̀ɛ̀. Yakubu s̄ ɔ̀ndɔ̀kɛ̀ Siria bori Labãnɛ̀ èe lezaaro. À fɛ̀ɛ̀ à bàale kɔ̀n a pɔ̀nɔ̀ pingi à bikũ Yuflatia, ben à mipè Giliada gusĩsĩdeea.

### **Labã pɛ̀na Yakubuzi**

À gurɔ̀ aagɔ̀dee zĩ wà bè Labãnɛ̀ Yakubu bàale. À a gbẽnɔ̀ kàkɔ̀a, ben à pèɛ̀zi. À taa'ò gurɔ̀ swɛ̀ɛ̀plaa, ben à à lè Giliada gusĩsĩdeen. Ben Luda bò à m̀zi gwãavĩ nanaa guu à bènɛ̀: Ì laakarika yã kɛ̀ né o Yakubunɛ̀zi à maaa ke à zaaa.

Labã Yakubu bùra lè pɛ̀na Giliada gusĩsĩdeen, ben à bùra kàe gwe kɔ̀n a gbẽnɔ̀ se. Ben Labã gàa à bè Yakubunɛ̀: Bɔ̀yãnzì n̄ ɔ̀ndɔ̀kɛ̀mɛ̀ n̄ ma nenɔ̀ sɛ̀ɛ̀ n̄ tańyo lan zĩzɔ̀nɔ̀ bà? Bɔ̀yãnzì n̄ ɔ̀ndɔ̀kɛ̀mɛ̀ n̄ wure kpãì n̄ɛ̀ lezamaro, le ma gaa zenne kɔ̀n

pɔnnakenao kɔ̃n lesinao kɔ̃n gāgāo kɔ̃n mɔɔɔ. Née tó ma leza ma neno kɔ̃n ma dionɔaro. N yɔ̃nkɔyā kè. Ma gbāaa kà mà yā zaaa keare, ben n de Luda yā'òme gwāavī à bè mà laakarika yā kè mé onnɛzi à maaa ke à zaaa. Née taa sa, kè née n de be bege kee yānzi. À kè dia n ma tāano sè kpāii? Yakubu wèlà à bè: Ma vīakè mée daa né n neno simame. Gbē kè n n tāano è à kiia, wà à de. Ìn ma pɔɔ gwagwa wa gbēno wāa. Tó n n pɔ è, ìn sé. Yakubu sɔɔ dɔ kè Raseli Labā pɔ sè kpāiro. Labā gè Yakubu bisa kutaan à gè Lea kutaan à gè nɔgbē zīkeri gɔɔn plaaa pino kutaan èe pɔke ero. Kè à bɔ Lea kutaan, à gè Raseli kutaan. Raseli taa pino sè à ùte lakumi gàari guume, ben à vèea. Labā à kuta guu gwàgwa pingi, èe pɔke ero. Raseli bè a denɛ: Baa, ìnton pɔfēmazi, zaake mée e mà fɛero kè má ɔkūna yānzi. Leme Labā a tāano wète le èe ero. Ben Yakubu pɔfè à lefɔtɔkà Labāzi à bè: Bó dàn má kè? Bɔ durunn má kè ben n pɛemazi wāawāa lan kè bà? Kè n ma pɔɔ gwàgwa pingi, n n be pɔɔ è gweɔ? Ìn bɔo gupuraa ma gbēno kɔ̃n n gbēno wāa, aɔ yā nnaa kpa gbē kè a yā nnaaa. Ma ke n be wè baro. N sāano kɔ̃n n blèno e nɔbɔero, mée n sāa ke soro. Mée sunne kɔ̃n pɔ kè nɔbɔ pāsino kù keoro, mèè à fiabonne mazīndame. Neè pɔ kè wà à kpāi'ò gwāavī ke fāantē fīa lama. Ɖfāntē è ma le fāantē, īa è ma de gwāavī, mèè itēke. Len ma ke n be le ai wè baro. Wè gèro dosai ma zīikenne n nenɔgbē gɔɔn plaaano yānzi. Ma wè swɛedoo kè n kpasa yā musu. N ma laada liɛ gēn kuri. Tó èe ke ma dezi Ibraī Luda kè ma de Isaaku à vīa vīi zèmao baasiro, le n ma gbare ɔkori. Luda zīi kè má kè kɔ̃n nawēao è, ben à kpākēnzi gīa gwāavī.

Ben Labā wè Yakubula: Nɔgbē kekiino sɔ ma nenɔme. Né kekiino sɔ ma dionɔme. Pɔkādee kekiino sɔ ma pɔkādeenɔme. Pɔ

kè ní è kè pingi ma pɔmɛ. Bɔn mé kɛ ma nɛnɔgbɛnɔ kɔn né kè aɔ  
inɔnɛ gbàa? Nì to wà lɛdole kɛ àgɔ de seeda ũ wa dagura. Ben  
Yakubu gbe sè à pɛɛ yā pì dɔngupɔ ũ. À bè a gbɛnɔnɛ aɔ gbɛnɔ  
sɛɛ, ben aɔ sè aɔ didikɔa, ben aɔ pɔblè à saɛ. Ben Labā tɔkpà  
gbɛdidikɔana pìnɛ Yega Saaduta. Yakubu tɔkpànɛ Galɛɛdi. Labā  
bè: Gbɛdidikɔana kɛkiin seeda ũ wa dagura gbàa. Bee yānzi wà  
tɔkpànɛ Galɛɛdi. Wè be dɔ Mizipa, zaakɛ Labā bè: Dii wa dākpa  
wa kɛkɔana gbera lɛ wàton zakɔnlo yānzi. Tó n ìadà ma  
nɛnɔgbɛnɔa kɛ tó n nɔ pāndenɔ sè dɔ, baa tó wá ku kɔ kiiaro,  
ngɔ dɔ sānsān kè Ludan wa yā pì seedadee ũ. Ben Labā bènɛ dɔ:  
Nì gbɛdidikɔana kɛkii gwa kɔn gbe kè má pɛɛ wa dagurao. Eégɔ  
de seeda ũ kè mé vīàla mà mɔ mà à zaaa kennɛro, mpi sɔ né  
vīàla n mɔ n à zaaa kemɛro. Ibraī kɔn Naoo kɔn ní deo Ludan  
wa yākpækɛri ũ.

Ben Yakubu sì kɔn Luda kè a de Isaaku à vīa vī tɔo. À saa'ò  
gusĩsĩdeen gwe, ben à a gbɛnɔ sisi aɔ pɔble. Kè aɔ pɔblè, ben aɔ  
ì gwe. Labā fɛɛ kɔngɔ idɛ'idɛ, à lɛzà a dionɔa kɔn a nɛnɔ à sa  
maaa ònné, ben à lìara à tà a bɛ.

## **Yakubu gbɛnɔ zīna Isaua**

Yakubu dà zen, ben Luda malaikanɔ dààlɛ. Kè à ní é, à bè:  
Luda bùran kè. Ben à tɔkpà guu pìnɛ Manaimu. À zīrinɔ zì a aɛ  
a vīi Isaua Sei bùsu kè wè be dɔ ɛdɔmu busun. À bè a zīrinɔnɛ:  
À gá à o ma dii Isaune à zɔbleri Yakubu guro plaa kè Labā bɛ èe  
suu sa. À onɛ má zùnɔ vī kɔn zaakinɔ kɔn sāanɔ kɔn blènɔ kɔn  
gɔgbɛ zīkerinɔ kɔn nɔgbɛ zīkerinɔo. Mambe ma a zī à onɛ lɛ ma  
à pɔnnaa e.

Kè zĩrinɔ ɛara wà sù Yakubu kiia, aɔ bè: Wa gaa n vĩ kiia, ɛe mɔ à danle kɔn gɔɔn wàa plaaanɔ. Vĩa Yakubu kũ ɛe bidikɛe maamaa, ben à gbẽ kè aɔ kuonɔ kpaatè leo plaa kɔn sãanɔ kɔn blènɔ kɔn zùnɔ kɔn lakuminɔ à bè: Tó Isau mɔ à sì à leo dooa, à leo doo kè gɔ́ é bɔ. Ben à aduakè à bè: Dii, ma dezi Ibraĩ kɔn ma de Isaakuo Luda, ní òmɛ mà su ma busun ma danenɔ kiia, né aubarikadamagu. N gbẽkɛe kɔn naanɛ yão kèmɛ maamaa ma bæe e karo. Gurɔɔ kè ma bikũ Yodaa, gò bé à na ma ɔzĩ ado. Tia sa ma su kɔn auziki leo plaaa kènɔ. Ma wɛɛkèmma n ma si ma vĩa, zaake mée vĩaɛɛne kè eé si wa te à nɔgbẽnɔ kɔn nenɔ dɛdɛ yãnzɪ. Mpi sɔ, n bè né aubarikadamagu né ma borii kaara lan isialea busu'aatɛ bà weé fɔ wà ní naroro ní pari yãnzɪ.

Gwen Yakubu in. Pó kè à pleple à a vĩ gbaanɔn ye: Blèda men wàa do, à kofii men baro, sãda men wàa do, à karo men baro, lakumida men baaakuri kɔn ní né bòrɔnɔ, zùda men baplaa, à sware men kuri, zaakida men baro, à kya men kuri. À ní ná a zɔblerinɔnɛ ní ɔzĩ bori kɔn boriiɔ, ben à bènné: Àgɔ te ma aɛ à kpangu da a dagura gã kɔn gão. À bè gbẽ kaakunɛ: Tó ma vĩi dànle à n la à bè: Déme n dii ũu? Née gaa mámɛ? Dé bé à pó kè née dāa kènɔ vĩi? N onɛ à zɔbleri Yakubu pɔmɛ, pó kè à a dii gbà à kpàsānenɔn gwe, àpi e suu kpɛɛ. À yã dɔnkɔ pì ò gbẽ plaadeenɛ kɔn gbẽ aagɔdeeo kɔn pɔdārinɔ ní pingi à bè: Tó a da Isaule, à onɛ lɛ. À onɛ à zɔbleri Yakubu e suu kpɛɛ. Zaake à laasuulè à bè: Mé à laakarikpae kɔn pó kè má kpà aɛ kènɔ, wé wɛɛsikɔlɛ. Eé gi gbāakekpamazi sao? Gbaa pìnɔ dònɛ aɛ, ben à gɔ́ bùran gwāavĩ mɔa à ì gwe.

## **Yakubu ɔsikana kɔ̃n Ludao**

À fɛɛ gwǎavĩ à a nɔ men plaaano sɛɛ kɔ̃n a nɔgbɛ zĩkeri gɔ̃on plaaano kɔ̃n a nɛgɔgbɛ gɔ̃on kuri awɛɛdoono, ben à bikũnyo Yaboku íbikũkiia. Kɛ à bikũnyo, ben à pɔ kɛ à vĩno sɛɛ à bikũo pingi. Yakubu gɔ̃ ado, ben gɔgbɛ ke mò èe ɔsi kaao ai guu kà dɔna. Kɛ gɔgbɛ pì è é fɔ̃ à à néro, à à lè a gisipekɔ̃rekiia, ben à gisi bɔ̀kũn ɔsikana pì guu. Gɔgbɛ pì bè: Ñ ma gbare, zaake guu e dɔɔ. Ben Yakubu bène: Tó èe ke ñ aubarikadamagu baasiro, mé n gbarero. Gɔgbɛ pì à là à bè: N tɔn diaa? À wèàla à bè: Ma tɔn Yakubu. Ben à bè: Weé benne Yakubu dɔro, sede Isaraili, zaake n ɔsi kà kɔ̃n Ludao kɔ̃n gbɛnteenɔ, ben n ɔsii nè. Yakubu bène: Ñ n tɔ omɛ se. A wèàla à bè: Bɔyǎnzi néé ma tɔ gbekaazi? Ben à aubarikadàn gwe. Yakubu tɔkpà guu pìne Penieli, zaake à bè: Wa wɛsɪkɔ̃lɛ kɔ̃n Ludao, ben mée garo. À bɔ̀ Penieli ɔfǎntɛbɔ̃ena, èe tɔ̃tɛɛ a gisi yǎnzi. Bee yǎnzi ai gbǎa Isarailino è nɔbɔ tugisi soro, kɛ Luda Yakubu lè à tugisia yǎnzi.

## **Yakubu wɛesina Isaule**

Kɛ Yakubu wɛesè, à è Isau e mɔɔ kɔ̃n gɔ̃on wàa plaaano. À a nenɔ kpaatètɛ Leane kɔ̃n Raselio kɔ̃n nɔgbɛ zĩkeri men plaaano. Ben à nɔgbɛ zĩkeri pìno gbàre aɔ dɔ aɛ kɔ̃n í nenɔ. Beee gbera Lea kɔ̃n a nenɔ, ben Raseli kɔ̃n Yusufu te í kpɛɛ. À dònne aɛ à kùè tɔ̃tɛ gɛ̃n swɛɛplaa ai à gàa à kàò a vĩ pì kiia. Ben Isau bàale à mò à dààlɛ à mlɛà, à ɔɔ dà à gǎn à lɛpɛà, ben aɔ ɔɔdɔ. Isau wɛesè à nɔgbɛno è kɔ̃n nenɔ, ben à bè: Denɔ bé wà kunyo kɛ? Yakubu wèàla à bè: Né kɛ Luda ma gbaanɔmɛ. Ben nɔgbɛ zĩkeri pìno sɔ̃nzi kɔ̃n í nenɔ aɔ kùè. Ben Lea kɔ̃n a nenɔ sɔ̃nzi dɔ aɔ kùè. Beee gbera Yusufu kɔ̃n Raselio sɔ̃nzi aɔ kùè. Isau

bè: Pó kè ma dañle kènɔɔ de diame? Yakubu wèàla à bè: Le ma n pɔnnaa e yānzime. Isau bè: Ma gbě, ma pɔnɔ mòmá, ñgõ n pɔnɔ kūna. Ben Yakubu bè: Auo! N yā nna! Tó ma n pɔnnaa è, ñ ma gba si, zaake wa weesikõlena kème lan weesikõlena kɔn Ludao bàme, ben n gbāakekpàmazi. Ñ gbaa kè ma mɔonnee si, zaake Luda aubarikadàmagu, pɔkee e kēsāmaro. Leme à nàkõrea le, ben à sị.

Ben Isau bè: Wà da zen wà ta. Mé gányo. Ben à wèàla à bè: Ma dii, í dõ kè nenɔ gbāa vīro, ben má sãa kɔn zùne bòrɔnɔ vī. Tó wa ta gbāaa ò gurɔ do, pɔkãdeenɔ é gaga pingime. Ñ dɔme aɛ ma dii, mɔma n zɔbleri mégõ te pɔnɔ kpɛe kɔn nenɔ busebuse ai mà mɔ mà n le Sei. Isau bè: Mé ma gběkenɔ tonyo. Yakubu bè: À kè dea né ke le dɔɔ? Ñ to mà n pɔnnaa e dii. Zī beeean Isau dà Sei zen. Ben Yakubu gàa Suko. À bee bò gwe, ben à lá kutaanɔ dò pɔnɔne. Bee yānzi wà tɔkpà guu pìne Suko.

Kè Yakubu sù kɔn Mesɔptamiao, à kà wete kè wè be Sekemu, Kanaa busun aafia, ben à bùra kàe wete pì sae. À a bùrakaekii lù Sekemu de Amɔ nenɔa kondogi basɔɔro. Gwen à sa'okii bòn, à tɔkpàne Luda Isarailinɔ Luda.

## **Sekemu kusina Dinaa**

Lea nenɔgbě Dina kè à ì kɔn Yakubuo bò à weekpae bùsu pì nɔgběñzi. Kè bùsu pì ki Amɔ né Sekemu, Ivi borii à è, à à sè gbāaa, ben à dàeo. À pɔɔ dɔ nɔkpare pìà à yezi, ben à yā nnannaa òne. Ben Sekemu bè a denɛ: Ñ nenɔkpare beee weteme mà sé. Kè Yakubu mà wà a nenɔgbě kpɛbò, à nenɔ ku sɛn kɔn à pɔkãdeenɔ, ben à yĩte ai aõ sù. Ben Sekemu de Amɔ gàa à Yakubu le à yā pì onɛ. Kè Yakubu nenɔ bò sɛn wà sù, ben aõ yā

pì mà gɔ̃ɔ. Aɔ nɔsɛ yàka aɔ pɔfɛ maamaa, kɛ Sɛkɛmu wiyā kɛ Isarailinɔnɛ yānzi, à dàɛ kɔ̃n Yakubu nɛnɔgbɛɔ à yā kɛ de wà kɛroo kɛ. Ben Amɔ bɛnné: Ma né Sɛkɛmu pɔɔ dɔ a nɛnɔgbɛa. A yā nna. À à kpaa nɔɔ ũ. Wà lɛdole kɛ wàgɔ wa nɛnɔgbɛnɔ kpāsāakɔa. Àgɔ kuwao, wa bùsu kuu a pɔ ũmɛ. À vɛɛn àgɔ laataan àgɔ tɔɔtɛ vī. Ben Sɛkɛmu ò Dina de kɔ̃n à dāgɔ̃nɔnɛ à bè: À to mà a pɔnnaa e. Pɔ kɛ a be mà kpaa wa mé kpa. À anzurebleɔ lɛ dame bita kɔ̃n gbaano paripari. Pɔ kɛ á ò mé kpa. À nɛnɔkparɛ pì kpama nɔɔ ũ.

Ben Yakubu nɛnɔ wɛ Sɛkɛmu kɔ̃n à de Amɔola kɔ̃n mɔnafikio kɛ Sɛkɛmu ní dāɛ kpɛbɔ yānzi. Aɔ bɛnné: Wé fɔ wà beee kɛro, wé fɔ wà wa dāɛ kpa gɛfɔɔdeearo, zaake wiyāme wa kiia. Wé we a yāziro, seto à gɔ lan wapino bà a gɔgbɛnɔ bāngukɛ ní pingi. Tó a bāngukɛ, wé wa nɛnɔ kpāsāawa wé a nɛnɔ sɛ nɔɔ ũ. Wégɔ kuao, wé gɔ bori dɔ̃nkɔ̃n ũ. Mɔde tó ée we wa yāziro, tó ée bāngukɛro, wé wa dāɛ sɛ wà taomɛ. Yā pì kɛ Amɔ kɔ̃n a né Sɛkɛmuone nna. Gɔkparɛ pì yā pì gɔgɔ kpakpaa kɛ Yakubu nɛnɔgbɛ yā kàne yānzi. À bɛɛ vī deñla a de bedeenɔ tɛ.

Amɔ kɔ̃n a né Sɛkɛmuo gàa ní wɛtɛ bīlɛa, ben aɔ yā'ò kɔ̃n wɛtɛdeenɔ wà bè: Gbɛ pino yāke vīwaoro. Wà to aɔgɔ ku wa busun aɔgɔ laataa, zaake bùsu pì yaasa eé mɔwa. Wé ní nɛnɔgbɛnɔ sɛ wé wa nɛnɔ kpammá. Gbɛ pino sɔ é we wàgɔ kuwao lɛ wà gɔ bori dɔ̃nkɔ̃ ũro, seto èe kɛ wa gɔgbɛ pingi bāngukɛ lan ní bà baasiro. Aɔ pɔkādeenɔ kɔ̃n ní auzikino kɔ̃n ní zùnɔ pingi é gɔ wa pɔ ũroo? Wà wenné lɛ aɔgɔ kuwao. Wɛtɛ pì deenɔ Amɔ kɔ̃n a né Sɛkɛmuo yāmà, ben aɔ gɔgbɛnɔ bāngukɛ ní pingi.

À gurɔ aagɔ̃dee zĩ, kɛ aɔ̃ ku kɔ̃n wāwāao aɔ̃ ku kɔ̃n yāke laasuuro, Yakubu né gɔ̃ɔ̃n plaaano Simeɔ kɔ̃n Levio, Dina vīno, aɔ̃ baade a fēɛdaa sɛ aɔ̃ sɪ wete aɔ̃ gɔ̃gbɛno dɛdɛ ní pingi. Aɔ̃ Amo kɔ̃n a né Sekemu dɛdɛ, ben aɔ̃ Dina sɛ aɔ̃ bɔ̃o Sekemu kpen aɔ̃ tào. Wɛtɛdeenɔ dɛdɛna gɛra Yakubu neno mɔ̃ wà wete pɔno nàkɔ̃a kɛ wà widà ní dārea yānzi. Aɔ̃ ní sāano kɔ̃n ní blɛno sɛɛ kɔ̃n ní zùno kɔ̃n ní zaakinɔ, pɔ kɛ aɔ̃ ku wete guuno kɔ̃n pɔ kɛ aɔ̃ ku ní buraano pingi. Aɔ̃ ní auzikinɔ sɛɛ pingi kɔ̃n ní neno kɔ̃n ní nɔgbɛno kɔ̃n pɔ kɛ ku ní bɛeno pingi.

Ben Yakubu bè Simeɔne kɔ̃n Levio: A sumɛ yā zaaao. Kanaano kɔ̃n Perizinɔ kɔ̃n bùsu kekii bori pāndenɔ égɔ̃ ye ma kāziro. Lan wá pariɔ nà, tó aɔ̃ lìgawazi, tó aɔ̃ sìwagu, aɔ̃é ma dɛ kɔ̃n ma boriinɔ pingimɛ. Ben aɔ̃ wèàla wà bè: Kɛ à wa dāre dɛ kaarua ũ, beee maan gweɔ?

## **Luda aubarikadana Yakubun Beteli**

Luda bè Yakubune: N̄ fɛɛ n̄ ta Beteli n̄ v̄ɛ gwe. N̄ ma gbāgbākii bo gwe, zaake ma bɔ̃ ma mɔ̃nzi gwe gurɔ̃ kɛ n̄ɛ bàa lɛɛ n̄ vīne. Ben Yakubu bè a bɛdeenɔne kɔ̃n gbɛ kɛ aɔ̃ kuono ní pingi: À bori zītɔno tāa kɛ á vīno kwɛɛ à zu'o à a pɔkāsāano lendeekpa. Wé fɛɛ wà ta Beteli. Mé Luda gbāgbākii bo gwe, zaake à dòmale ma nawēakegurɔ̃, ègɔ̃ kumao guu kɛ ma gaan pingi. Ben aɔ̃ bori zītɔno tāa kɛ aɔ̃ vīno kpàa kɔ̃n swāi kɛ aɔ̃ danano, ben à pɔ̃ pìnɔ vīi gbii lí gbaru Sekemu saɛ. Kɛ Yakubu kɔ̃n a neno dà zen, Ludaa tò vīa wete kɛ ku ní saeno deeno kù maamaa, ben aɔ̃ gbēkee e pɛɛnziro. Ben Yakubu kɔ̃n gbɛ kɛ aɔ̃ kuono ní pingi kà Luzu kɛ wè be tia Beteli, Kanaa busun. À sa'okii bɔ̃ gwe, ben à tɔkpà guu pīne Beteli Luda, zaake gwen

Luda bô à m̀òzin gurɔɔ k̀è èe bàà sii a v̄ine. Debora k̀è de Rebeka gwari ũ yāa g̀à gwe, ben wà à v̄ii gbii lí gbaru Beteli saε. Ben wà tɔkpànε Ídɔɔlizi.

Luda bô à mɛ Yakubuzi dɔ à suna kɔ̃n Mɛsɔpɔtamiao gɛra, à aubarikadàn à bè: N tɔ̃n Yakubu, mɔde weé benne Yakubu dɔro, sé Isaraili. Lɛmɛ à tɔkpànɛ Isaraili lɛ. Luda bènɛ dɔ: Luda Gbāapingiden ma ũ. Àgɔ̃ nɛ'ii àgɔ̃ kaara. Borii é bɔ n kiia kɔ̃n bori pariinɔ dɔ, n bori kenɔ égɔ̃ dɛ kinanɔ ũ. Mé bɔsu kè má kpà Ibraĩ kɔ̃n Isaakuoa kpamma kɔ̃n n boriinɔ n gaa gɛra. Ben Luda fɛɛ à bô guu kè à yā'ònen. Yakubu gbɛ pɛɛ guu kè Luda yā'ònen dɔngupɔ ũ. À í tɔ̃a à nɔsi kùà. Ben Yakubu tɔkpà guu kè Luda yā'ònen pìnɛ Bɛtɛli.

## Raseli kōn Isaakuo gaa

Ben aɔ fɛɛ Beteli wà dà zen. Kè aɔ kà kīi kōn ɛflatao, Raseli ne'igurɔɔ kà, ben ne'ii kèa zī'ũ. Né'iwāwāa à kũ gbāa, ben nésɛɛri bène: Nton vīakero, n nɛgɔgbẽ ì dɔ. Raseli gbāa vī dɔro èe gaa, ben à tɔkpà a né pìne Benɔni, ben à de tɔkpàne Beyāmi. Kè Raseli gà, wà à vīi ɛflata kè wè be tia Betelemu zen. Yakubu gbe dɔngupɔ pèè à miraa. Raseli mira gbe pì ku gwe ai kōn a gbāao.

Isaraili èara à dà zen, ben à bùra kàe sǎdǎrĩnɔ gugwagba aɛ. Gurɔɔ kɛ̀ à ku bùsu pìn Rubeni gàa à dàɛ kǒn Bilao, Yakubu nɔ yigisai, ben Yakubu yǎ pì mà.

Yakubu negõgbẽnɔ̀ ì mèn kuri awɛɛplaa. Lea negõgbẽnɔ̀n yɛ: Yakubu daudu Rubeni, Simeɔ, Levi, Yuda, Isaka kɔ̀n Zɛbulunio. Raseli nɛnɔ̀n Yusufu kɔ̀n Beyāmio ũ. Raseli zīkeri Bila nɛnɔ̀n Dani kɔ̀n Nafatalio ũ. Lea zīkeri Zilipa nɛnɔ̀n Gada

kõn Asao ù. Négõgbẽ kè wà ní í kòn Yakubuo Mesopotamianon gwe.

Ben Yakubu kà a de Isaaku kiia Mamare. À ku Kiriataba kè wè be tia Eblonu sae, guu kè Ibraĩ kòn Isaakuo v̄een. Isaaku kà wè bakẽndo à zikù kotokoto, ben à gà à kà a gbẽnɔla, ben à nenɔ Isau kòn Yakubuo à v̄ii.

## Isau boriino

Isau kè wè bene dɔ Edomu boriino yān ye. Isau Kanaa nɔgbẽnɔ sè, Iti bori Elni né Ada kòn Ivi bori Ana né Ɖolibama, Zibeɔ dioo. À Sumaila né Basema, Nebayo dāre sè dɔ. Ada Elifaza ò, ben Basema Rueli ò. Ɖolibama Yeusu kòn Yalamuo kòn Korao ò. Isau negõgbẽ kè wà ní í Kanaa busunon gwe.

Isau a nɔnɔ sèe kòn a negõgbẽnɔ kòn a nenɔgbẽnɔ kòn a bɛdeenɔ ní pingi kòn a pɔkãdeenɔ kòn a auziki kè à è Kanaa busunɔ pingi, ben à gàa Sei busun à zà kù kòn a dāaro Yakubuo, zaake aɔ auziki bita bé à tò aɔé f̄ wàgɔ ku kɔoro. Bùsu kè aɔ kun e mɔmmáro, kè aɔ pɔnɔ pari yānzi. Isau v̄ee Sei gusĩsideen kè wè be tia Edomu.

Isau kè de Edomunɔ dezi kaaku ù boriinon ye. Isau negõgbẽnɔ ton ye: Ada né Elifaza kòn Basema né Ruelio. Elifaza negõgbẽnɔ Temana, Omaa, Zefo, Gatamu kòn Kenazio ù. Elifaza nɔ yigisain Timina ù. Àmbe à Amaleki ò. Isau nɔ Ada dionon gwe.

Rueli negõgbẽnɔ ye: Naata, Zera, Sama kòn Mizao. Isau nɔ Basema dionon gwe.

Isau nɔ Ana né Ɖolibama, Zibeɔ dioo negõgbẽnɔ ye: Yeusu, Yalamu kòn Korao.